

Ɖwulúá Bɔwanlín Sísí Hebrifo

Bulu Asún Ina Mu Bi Ámuvu

1 ¹Bímbí ámu a, Bulu lótsun ɔkpa ɔtsan-ɔtsansu tóí kplá anu anáin bré tsɔtsɔtsɔtsɔ tsun mu ɔnósú atópúsu. ²Táme séi ánfu ɔyí ubá bɔmɔ ɔnɔ ánfu mú á, alatóí kplá anu tsun mu Bi ámuvu. Mvgyí ɔhá ání Bulu léle ání ógyi mu ató ní. Mu Bi ánfisu ɔlɔtsun bwe tógyító. ³Muvu Bulu Ɖkɔnkpɔnti numnyam ɔwánkí tsun. Mvgyí ɔhá ání ɔlehie lian Bulu, ɔde mu asún ámbú ubu túmi ámu pukú tógyítósú ni. Bréá ɔlɔgyvráa anu tá á, oletsíá ɔsúsú Bulu Otúmípu amu gyɔpɔsu.

Bulu Mu Bi Ámu Lófuvá Dvun

⁴Bulu lótsu mu Bi ámu fúá dvun *Bulu-abɔpu fée. Alí kén ɔleha mu dá dvun amú ní. Inu lósuná ání ɔdvun amú fée. ⁵Tsúfí Bulu mókúbláa mu abɔpu amutɔ ɔkukuvuku kí ɔbé,

“Mí B́ gyí fú,
nde nabwé fú Ś.”

Ntéé bláa amútó ɔkuku ɔbé,

“Nóbwe fú Ś,
fú é fóbwe mí B́.”

⁶Inu ɔma asa Bulu ɔbówa mu Bití ámu sísí ɔyító á, ɔleblí ɔbé,

“Mí abɔpu fée busúm mu.”

⁷Tóá ɔleblí tsú mu abɔpu amu mú iwɔ gyí,

“Nabwé mí abɔpu fé afú.”^a

^a 1:7 afú ntéé ɔhé. Ɖhé múa afú leltan aba Griiki ɔblító.

Nabwé mí asúmpú fé ogya plenplen.”

8Táme ɔlebláa mu Bi ámu mú ɔbéɛ,

“Óo Bulu, fú iwíegyí méeta ekekekeke!

Yilébwɛ gyí fú iwíegyí akɔnfra.

9 Yilébwɛ futekle. Futekísí lalahɛ féé.

Mú su mí, fú Wíe Bulu nalé fú, dá fú ofúli.

Napú ansigyí wá fúfú dvn fú aba.”

10Bulu asvn wanlínhé amu létrá blí ɔbéɛ,

“Mí Wíé, fúlówa ɔsulúv ntswiasí bréá fefi ɔyí así.

Fú onutó ibi fɔpɔbwé ɔsósó.

11 Mú féé bófwí, táme fú mú fétsiá bré féé.

Mú féé bóbwɛ dáda fé tatida.

12 Fókuntá mú fé tati.

Fétse mú fé atadiɛ.

Táme fú mú futamatɛ.

Fú nkpa mɔ́mɔ ɔnɔ ekekekeke.”

13Bulu mébláa mu ɔɔpɔ ɔkuku ɔbéɛ,

“Tsia mí gyɔpɔsu,

yɔfun bréá nɔpɔ fú alupú bwé fú ayabi oyíkpa.” fé

alá ɔlebláa mu Bi ámu.

14Ntɔ mɛɛ Bulu-abɔpɔ bugyi? Megyí ɔyé bugyi, Bulu tɔwá butɔbúa ahá ání ɔbɔhɔ amú nkpa?

Nkpahɔ́ Kpɔ́kpɔ́kpɔ́kpɔ́ntɔ

2 ¹Ínu su ilehián ání abékutá ɔɔkwali asún ámúbú anılanú ámɔɔ kínkíínkín, méni uméedali aní ibi. ²Tsúfé mbla ámúbú Bulu lówa há aní anáin tsun mu abɔpɔsu ámu igyi ɔɔkwali. Ínu su ahá ámúbú bɔwa asɔɔ-ɔnlɔn, bomegyi músú ámu benya usubutí ání ida ɔkpa. ³Nkáli aní mú abétalí srí usubutí ámu, ní akíná nkpahɔ́ kpɔ́kpɔ́kpɔ́kpɔ́ntɔ ánfí? Aní Wíe onutó légyankpá blí mú asún. Ahá ámúbú bonu mú ámu é begyi mú iwí adánsɛ súná aní bɛɛ, ibi mótɔ́. ⁴Bulu onutó

é lóbwe ofúla pú osúna ɔtsan-ɔtsan mu túmitɔ, ɔleha ahá mu *Ɔɔɛ Wankíhé atokiehé bréá iletsiá mu, púdínká ibwi músú ání ɔnɔkwali igyi.

Nkpahóɔ Ɔkpa Osunápú

⁵Bulu mɔɔpu ɔyi ámúú ibá, anidé mú iwɪ asún blí ámu wá mu abɔpu ibuto ɔbéɛ, bugyi músú. ⁶Mboún fé alá ɔku lówanlín wá Bulu asún ámuto ɔtineku ɔbéɛ,

“Óo Bulu, nto nyankpusa gyí, sù fú ansí idun musu ah?

Nto nyankpusa gyí, su fúteki musu?

⁷Bré itinbí kuto pé feba mu así dun fú abɔpu.

Fɔpu numnyam pú obú dínká musu,

⁸feha mu ɔde ató féésú gyí.”

Ní Bulu asún ánti déblí ɔbéɛ, “Ató féé” á, idesuná ání ɔto mesian ání ɔmedé músú gyí. Séi ánti á, anumókúnyá wun ání ɔde ató féésú gyí. ⁹Táme anilawun Yesu. Bulu léba mu así dun mu abɔpu bré itinbí kuto. Awitɔle Bulu lówa bwé mú alí, tsúfé ɔleha Yesu lówu ɔhagyícha nwunsu. Anilabí ánti séi á, Bulu lapú numnyam pú obú dínká musu, iwɔtsun ámúú olowun, wú ámu su. ¹⁰Bulu, ató féé Ɔlepú pú músú Ɔkípu amu ɔbékpa mu abí tsɔtsɔtsɔ ba mu numnyamto. Mú su ibu aláá ɔlɔtsun Yesu amúú ogyi amú Nkpa Ɔhópu amu lowusu há mu ɔlɔfun, ménti ɔbóho amú nkpa.

¹¹Yesu amúú ɔtɔgyúráa ahá lé amú lakpanto ámu mva ahá amúú alagyúra amu féé babwé Ɔsí ɔkule abí. Mú su uma mu péli ánti ɔbétu amú ɔbéɛ mu apíó. ¹²Ɔlebláa Bulu ɔbéɛ,

“Nékla fú bwehé súná mí apíó.

Nékanfú fú aní ofiákpa.”

¹³Ɔleblí bré bámbátó é ɔbéɛ, “Nópu ansí dínká Bulusu.” Ɔletrá blí ɔbéɛ, “Kí, mía abí amúú Bulu lapuhá mí ámu líí á.”

¹⁴Ínúá anyánkpúsa abí amúú Bulu lópuhá mu amu bugyi su á, ɔlobwe mu iwɪ nyankpusa fé amú, ménti ɔbótsun mu lowusu swíí Ɔbunsám túmi, yíntá mu. ¹⁵Ɔkpa ánti pésú ɔbétalí tsun há ahá amúú benya lowu ifú, su ɔobwe nkpábi amú nkpatɔ féé ámu bégyi iwɪ ní. ¹⁶Tsúfé ida yaí ánti megyí

Bulu-abɔɔpu nkpa ɔhɔkpa ɔleba, mboúin Abraham abí-aná. 17Íni su ilehián aní ɔbélian mu apíó tógyítót, méni ɔbɔbwe amú *igyí ɔhapú dehen aní obówun ahá nwe, wá ɔnɔkwali Bulu ansít. Fówun ɔbétalí bɔ amú lakpan iwí afɔɔɔ há Bulu, obésikíé amú. 18Bɔɔ mu kí, mu onutó é ɔlɔtsun iwɔɔsintɔ. Mú su ɔbétalí gyí ahá aní butɔɔ amú kí é buale.

Yesu Dun Mose

3 1Íni su apíó aba aní Bulu latí mli wá ɔsúsú ayɔɔpút, mliɔpu ansí dínka Yesusu. Mvgyí Bulu sumbí ɔɔɔpú pú mu *igyí ɔhapú dehen amú anidé mu iwí asún blí ámu ni. 2Oɔwa ɔnɔkwali há Bulu, Bulu léle mu ɔbéé, ɔbɔɔ mu agyómá fé alí ámú Mose lɔwa ɔnɔkwali há Bulu, Bulu lɔpu mu wóyí féé wá mu ibutɔ ámu. 3Táme obú bu Yesusu dun Mose, fé alí butobú wóyí oyípu dun wóyí ámu. 4Wóyígyíwóyí á, ɔha léyi mú, táme ató féé ɔbweɔpú gyí Bulu. 5Mose lɔbwe osúmpú ɔnɔkwaliɔwá ɔde Bulu wóyísú kí. ɔlebláa amú asún aní Bulu ɔbéblí ekekú. 6Táme Kristo lɔbwe obí ɔnɔkwaliɔwá ɔde Bulu wóyísú kí. Bulu wóyít abí angyí, ní anilɔwa klun kítá mu ɔkpakítɔ kínkíinkín yɔfun mú ɔnómkéké.

Bulu Ahá Bédá ɔkpúnú

- 7Mú su ibu Bulu asún ámutɔ aní *ɔɔɔ Wankíhé léblí ɔbéé,
 “Nde, ní mlonú Bulu ɔme a,
 8 mliwáwa asutɔ-ɔnlun, fé alí mli anáin Israelfɔ
 bɔbwe bréá bɔkúsú líí Bulusu,
 ɔɔ mu kí dimbí ámusu.
 9 Inú mli anáin bɔɔɔ mi kí ni.
 Ibu mútɔá bowun mí bwehé nfí advana (40) kéké.
 10 Íni su nanya ɔblɔ wa amú, blí mbée,
 ‘Butedáli mí ɔma brégyíbré,
 kína mí asúnsú gyí.’
 11 Mú su nanya ɔblɔ ká ntam mbée,
 ‘Ní bówie mí ɔkpúnú ɔdakpá unu fíin! Neká
 nɔtún!’ ”

¹²Mí apió, mlíkí wankláán ání mlítɔ ɔkuku méenya klɔn laláhe ání itamahɔ Bulu gyi, méni uméeha mu ɔdal Bulu ɔkiankparɔv amu ɔma. ¹³Mboún mlítɔv kpla aba ekekegyíekeá ɔyí lɛke, beti mú “Nde,” fé alíá Bulu asɔn wanlínhé anfi ideblí. Fówun lakpan méemlé mlítɔ ɔkuku, há mu ɔwa asɔtɔ-ɔnlɔn. ¹⁴Tsúfé ní akítá aní hógyitɔ kínkíínkín, fé bré ámúú anilótɔ hógyi amu yófun mú ɔnómw a, ania Kristonyɔ abékan, bwé toku kole.

¹⁵Fé alíá Bulu asɔn wanlínhé amu léblí. ɔbéé,

“Nde, ní mlonú Bulu ɔme a,
mlumáwa asɔtɔ-ɔnlɔn, fé alíá mli anáin Israelfɔ
bɔksú líí Bulusu.”

¹⁶Amendí lónu Bulu asɔn blíhé, táme bɔksú líí musv? Megyí ahá ámúú Mose lékpa tsú Egiypte ɔsulósv ámu féé? ¹⁷Amendí Bulu lénya ɔbló wá nfi advana (40) kéké? Megyí amú kén lóbwe lakpan, bowu sin *dimbísú unv ní? ¹⁸Amendí Bulu léka ntam há ɔbéé, “Ní bówie mí ɔkpúnú ɔdakpá unv fíín! Neká nɔtún?” Megyí ahá ámúú bɔksú líí musv ámu? ¹⁹Múmú ulawánkí aní ání amú Bulu máhógyi sú bumɔyɔ ɔsulóv amusu yéda ɔkpúnú.

4 ¹Nhíhíé ámúú Bulu lóbwe ɔbéé, mɔpu mu ɔkpúnú ɔdakpá há aní ámu utráa da. Mú sv mlíha akí wankláán, méni uméeba ání mlítɔ ɔku oméenya unv yó. ²Tsúfé beda *asɔn wankláán ámu ɔkan súná aní, fé amú, táme bumɔhɔ asún ámusv gyi. Mú sv unɔwa labi há amú. ³Tsúfé aní ahá ámúú anilahɔ músú gyi amu obówie mu ɔkpúnú ɔdakpá unv. Ahá amúú bumɔhɔ músú gyi amu mú á, Bulu léblí tswí ɔbéé,

“Nenya ɔbló, ká ntam mbéé,

‘Ní bówie mí ɔkpúnú ɔdakpá unv fíín! Neká
nɔtún!’ ”

lbu mútɔ ání Bulu léhíhíé ɔkpúnú ɔdakpá unv yáí tsú bréá ɔlele ɔyí ɔpá. ⁴Tsúfé bɔwanlín eke síénósí amu iwí asún wá Bulu asɔn ámutɔ beé, “Eke síénósí a, Bulu léda ɔkpúnú tsú mu gymagyihe féétú.” ⁵Fé alíá anulanú bɔtsɔn a, Bulu ɔbéé,

“Ní bówie mí ɔkpónú ɔdakpá unv fíín! Neká nɔtún!” 6Íni dēsuná ání aku mú bówie unv. Táme ahá ámúbú begyankpá nú asun wankláán ámu bumenya unv yó, tsúfé bumobu mu. 7Íni sv Bulu létrá hie eke bámbá, ɔletí mú “Nde.” Nfí tsɔtsɔɔtsɔ ɔma a, ɔlɔtsun Owíe *Dawidsu tóí tsú alí eke ánfí iwí, fé alíá íbu Bulu asún ámutɔ ɔbéé,

“Nde, ní mlonú Bulu ɔme a,
mlumáwa asutɔ-ɔnlun.”

8Ní amú ɔkparú *Yosua léha beda ɔkpónú á, tekí Bulu métrá hie eke bámbá. 9Íni sv *ɔkpónú ɔdaké kvá ina ɔtsan ɔda gyo Bulu ahá, fé alíá Bulu léda ɔkpónú eke síénósí amu. 10Tsúfé ɔhá ání olowie ɔkpónú ɔdakpá unv é ladá ɔkpónú tsú mu é mu gyumagiye kugyíkutɔ, fé alí ámúbú Bulu léda ɔkpónú tsú mu kle kugyíkutɔ ámu. 11Mú sv mliha abɔ mbódí awie ɔkpónú ɔdakpá unv, méni anitɔ ɔkuku méesin ɔkpatɔ fé alí ámúbú Israelfɔ ámu bɔwa asutɔ-ɔnlun, besin ɔkpatɔ ámu.

12Tsúfé Bulu asún ámu íbu nkpa, itɔyó agyómá. Íbu ogyá dun ɔdayí íya anyɔ kugyíku. Íteká ɔha alí yówie mu ɔkláa pú mú ɔhé ofiakpa, mu ntsakpá pú mu awú nfɔtɔ. Ítegyi aní agywun pú tśá anitekúle tsú aní kluntɔ asún. 13Tɔtɔɔtɔ tamanjáín Bulu! Tógyítɔ da yayá mu ansítɔ. Mu abóyóbu aní tsiátɔ akúnta kugyíku súná ní.

Aní Bulu Igyí ɔhapú Dehen

14Aníbu *igyí ɔhapú dehen kpɔnkpɔntí ání aladá fá ɔsúsú yó ɔbu Bulu wá. Mugyí mu Bì Yesu. Íni sv mliha akíta Yesu anfí anidé mu iwí adánsie gyí anfitɔ kínkíínkín. Anímádunkí ansí musu. 15Tsúfé mu mú omegyí ɔhá ání omóonu aní así ní anímétálí gyí iwísv. Ogyi ɔhá ání bɔɔ mu kí ɔkpagyíɔkpasu fé aní, táme ɔmɔbwe lakpan ekekekeke. 16Íni sv mliha awa klun, ayɔ Awitɔlepɔ Bulu obíá así. Fówun obówun aní nwe, wá awitɔle, kpá aní aní ohíánke.

5 1Lé butelé igyí ɔhapú dehen okugyíɔku tsú mu aba anyánkpúsatɔ, ɔtelí amú nwun Bulu ansítɔ. ɔtɔhɔ atɔ hahé pú lakpan afɔdié-abɔtɔ tsú amú wá, púhá Bulu igyí. 2Mu onutó é ɔtamatalí gyi iwísv bré tsɔtsɔɔtsɔtɔ. Mú sv

otenyá klun há ahá ání bumeyín olala pú amúá bafwí okpa. ³Mú su ilehián ání ɔbɔbɔ afɔɔɔ há mu onutó lakpan, fé alíá ɔtɔbɔ há mu ahá. ⁴Ohaa tamawá mu iwí numnyam ɔbéé, Bulu igyí ɔhapú dehen mɔgyi. Mboún Bulu tétí ɔha, bwé mu mu igyí ɔhapú dehen, fé alíá ɔlobwe *Aaron.

⁵Alí kén Kristo onutó é mɔwa iwí numnyam ání Bulu igyí ɔhapú dehen mɔgyi ní. Mboún Bulu lébláa mu ɔbéé,

“Mí Bí gyí fú.

Nde nabwé fú Sí.”

⁶Bɔwanlín wá Bulu asún ámu ɔtineku é beé, Bulu ɔbéé,

“Bulu igyí ɔhapú fúgyi bré féétó,

fé *Melkisedek.”

⁷Bréá Yesu tsie nkpa ɔsulúv anfisv á, ɔlɔpv kokóli múa isú bɔ mpái, kplón kúklókúú, pú mu atɔ kulíhé tswí Bulu ání ɔbétalí hɔ mu nkpa ansító. Mu iwiasibá sum Bulu sv Bulu lónu mu mpái. ⁸Ibu mótóá Bulu mu Bi ogyi mú, táme ɔlɔtsun iwɔsɔntɔ asa ɔletalí bí alíá Bulubu ihíé igyi. ⁹Íniá ɔlobwe tógyítóá Bulu lówa mu bwe sv á, olemlí okpa ání ahá ání butobú mu féé bótɔsun mósú nyá nkpahɔɔ ání itamatá. ¹⁰Bulu léle mu súná ání ogyi mu igyí ɔhapú dehen, fé alíá ɔleyáí Melkisedek.

Mlumási Hógyi Amvto

¹¹Mbu asún tsɔtsɔɔtsɔá abéblí tsú Melkisedek asún ánfu iwí. Táme mú asile súná mli íbɔwa ɔnlun. Tsúfé séi á, mlítráa mli médé asún así nu ɔsasv. ¹²Teki bɔfun alí bré ánfítɔ á, mlílamlí asunápú, táme mlilétrá hián ɔhá ání obósuná mli atɔ gyankpapv á íbu Bulu asún ámvto. Múgyí, mliléhián atosuanhéá ɔlɔɔn fé nyópv-ntsu. Megyí múá íbu ɔnlun fé atɔ wíhé ntéé atogyihe onutó. ¹³Táme kebi ɔbɔwe tónyópú. Omeyín tóá gyí yilébwe. ¹⁴Ohande tégyi tóá íbu ɔnlun, tsúfé alatsuntsun ntobító kí, alakásí bí yilé múa lalahe.

6 ¹Mú sv mli mátrá butía aní ayabi ya ɔma. Mliha akasí múá íbéha aní abóyɔ nkpa, así Kristo iwí atosunáhé gyankpapv amvto plá laplá. Mehián ání abétrá suná ató tsú Bulu hógyi pú klvntɔdamlí tsú bwehéá utetí lowu iwí,

Heb

²atosunáhé tsú *asúbɔ, ibi pudínká ɔhasu,^b afúlikusú pú Bulu asúngyí eke tráhe amu iwí. ³Ní Bulu lótsulá á, múmú múá ibéha abóyɔ nkpa sɔ́n abósuná mli ngya.

⁴Ní ahá ání bawun Bulu wanki amu ki, badá ɔsúsú atokiehé ɔnɔ ki, banyá Ɖɛ Wankíhé amu é ki, ⁵badá Bulu asún á múbú ibu alé ámu pú bré á múbú ibéba amu ɔ túmi ɔnɔ ki, ⁶mú ɔma bedida hógyitɔ á, butamatálí trá damlí kluntɔ. Tsúfé amú onutó ámu trá bude Bulu mu Bi ámu da mántá *oyikpalíhesu, tsú mú líí bɛɛ, ahá bubwée mu ahinlá ní.

⁷Anyánkpúsa aku bugyi fé ɔsulá itonu ntsuá nyankpu détswie wulí músú, atɔ tɔwá alé, wá labi há ahá ámu su á múbú bɔɔ mú ámu. Bulu toyúlá alí ahá ánfí odu. ⁸Táme aku é bugyi fé ɔsulú ání tunkpa múa awu aná tɔkwe músú, butamawá labi. Ní bumeki wankláán á, Bulu ɔbɔlwí amú, wá amú ogyá.

⁹Táme apíó adwepú, ní nde íni blí ó á, opúni medé mí tsií. Tsúfé nyin ání mlidé atɔ wankláán bwe, idesuná ání Bulu laho mli nkpa. ¹⁰Tsúfé tɔ́á ida ɔkpa Bulu tɔbwé. Ɖméetan mli gymagiye pú ɔdweá mlulalé súná mu tsú mu ahátsatɔ, mlitráa mlibu músú. ¹¹Nhíé ndeklé mbée, mlitɔ okugyíɔku ɔbɔwa iwí ɔwunlín, bwé mú yɔ́fun mú ɔnɔmɔ, fówun itɔ á múbú mli ansí dín músú ámu ibéba mútɔ há mli. ¹²Mmedékléá mli mlí ɔɛ́tɔ awuliyɔpú. Mboún mlíkasi ahá á múbú amú hógyi pú amú iklunya su amú ibi béda itɔ á múbú Bulu léhie yáí ámu.

Bulu Lédunká Ibwi Tɔ́á Ɖlehie Yáísú

¹³Bréá Bulu léka ntam há *Abraham a, ɔhaa má unvá ɔɔɔn mu Bulu. Mú su mu onutó iwí ɔlɔ́puká ntam. ¹⁴Ɖbée, “Nekáse, néhie yúlá fú. Néha fú abí-aná békleí tsɔtsɔɔtsɔ!” ¹⁵Abraham lénya klun. Mú su olenya itɔ á múbú Bulu léka ntam ɔbée méha mu amu. ¹⁶Ní ɔku ɔbéka ntam a, ɔhá ání

^b6:2 *Ibi pudínká ɔhasu* igyi amándíé ání ɔpasua ahande butɔbwé púwá ahá ání balé há gyma ku gyí ɔpasua ámu ɔwunlín, ntée pútsá ahá ulɔ, ntée púkúlí Bulu Ɖɛ Wankíhé há amú.

ɔdun mu idá ɔtɔpóká ntam amu. Isuna ání nwéengyí kuku má mu ntam amu iwɪ. ¹⁷Íni su bréá Bulu dékléá obósuná ahá ámúbú ɔlehɛ tɔ ámu há ámu ání ɔméesɛ mu agywun ekekeɛke á, ɔletanu mu iwɪ. ¹⁸Bulu tamawá afunu! Mu tɔ ámúbú ɔlehɛ yáí ámu, pú ntam amu igyi atoku anyɔ ání uméesɛ ekekeɛke. Íni su anɪ ahá ámúbú anlasrí tanu mu amu anɪbu tɔ́á abɔpɔwá iwɪ ɔwunlín, akɪta tɔ́ ámúbú anɪdé ɔkpa kú amutɔ kínkíínkín. ¹⁹Anɪ ɔkpakú anfi lakítá anɪ yáí fé alá ɔtan tekítá obu líí. Anɪ ɔkpakú anfi tekpá anɪ, anɪtɔsun tati ámúbú isian ɔsúsú ɔwankíkpatɔ ɔwankíkpa obu-ɔnɔ́ ámutɔ wíé mútɔ́. ²⁰Anɪ su Yesu lagyankpá yɔ́ ɔbu obu ámutɔ unɔ dodo. Alamlí *igyí ɔhapú dehen ání ɔbu unɔ bré féétɔ́ há anɪ fé Melkisedek.

Bulu Igyí ɔhapú Melkisedek

7 ¹*Melkisedek anfi á, owíe ogyi Salem. ɔlobwe ɔsúsúúsú Bulu amu igyi ɔhapú. Eke ɔku Abraham lóyɔ́kɔ awíe abaná aku isá, gyí amúsú. Bréá oleyinkí ɔbá á, olefia Melkisedek. Melkisedek lóyulá mu. ²Abraham léye atɔ́á olenya tsú isá ámutɔ idú, ɔlɔpɔ idúsí há Melkisedek. Idá ánfɪ asɪ gyí, “Yilébwe Owíe.” Mu idá kule é gyí “Iwilwii Owíe,” tsúfé Salem asɪ gyí, “Iwilwii.” ³Bulu asún meblí asvansu tsú Melkisedek akwíúpú ntée mu ulntɔ, mu kwí ntée mu lowu iwɪ. ɔlelian Bulu mu Bi ámu. Bulu igyi ɔhapú ógyi bré féétɔ́.

⁴Mlɪkɪ alɪá Melkisedek gyí ɔha kɔnɔkɔnɔkɔntɪ ɔku. Anɪ náin Abraham kúráá léye mu atɔ́á olenya tsú isátɔ́ idú, pú iku kule há mu. ⁵Mose Mbla léha Lewi abí-aná, bugyi igyi ahapú ámu ɔkpa ání buhɔ́ atɔ́ yée *idútɔ́ kule tsu amú ahá Israelfɔ wá. Ibu mútɔ́ ání Abraham abí-aná amú é bugyi. ⁶Melkisedek anfi mótsú Lewi abí-anátɔ́, táme ɔlɔhɔ Abraham atɔ́ yée idútɔ́ kule, yúlá Abraham mboún ámúbú Bulu léka ntam há ámu. ⁷Nwéengyí ma mú iwɪ ání ɔhá ání otoyúlá dun ɔmúvá budevulá. ⁸*Yudafɔ igyi ahapú ámúbú butɔhɔ Israelfɔ atɔ́ idútɔ́ kule amu butowú, táme ɔlɔhɔ Abraham atɔ́yeto idúsí anfi mú trá otsie nkpa fé alá Bulu asun wanlínhé amu déblí. ⁹Ní

Heb

anumɔ́wa afunu a, abétalí blí aniaa, bré ámúú Abraham lópu mu ató idútó kule há mu amu a, Lewi abusuan ámúú butɔ́hɔ Israelfɔ ató idútó kule amu é beka mú tsun *Abrahamsu. ¹⁰Tsúfé Lewi bu mu nain Abraham iwɔ́tɔ, bumɔ́kúnyá kwíí mu asa mu nain lópu mu ató idútó kule há Melkisedek.

¹¹Ibu mótó ání Mose mbla ámu léblí ání Bulu igyí ahapú butsíu Lewi abusuantɔ. Ní bétalí há ɔha ɔbɔ́fun a, tekti Bulu métrá le mu igyí ɔhapú bámbá ání ogyi fé Melkisedek, omotsú *Aaron abusuantɔ. ¹²Ní betse igyí ahapúle mbla ámu a, múmú ilehián ání bétse Mose mbla ámu é. ¹³Tsúfé aní Wíe anfi anidé mu wɔ asún blí ánti otsú abusuan bámbátó. Abusuan ánti ɔhaa mɔ́kúsúm *afɔ́ɔɛ-asubwi amusu ki. ¹⁴ɔhagyíɔha yin ání Yuda abusuantɔ aní Wíe anfi otsú. Mose méti abusuan ánti ɔdá bréá ɔde abusuan oduá bɔ́bwe Bulu igyí ahapú wɔ asún blí.

Bulu Igyí ɔhapú Bambá Ání Ogyi Fé Melkisedek

¹⁵Bulu mbla ánti tséé latráa wankí aní tsía, tsúfé igyí ɔhapú bámbá labele wɔ ɔwan fé Melkisedek. ¹⁶Mbla dada amu ilosuná ání Lewifo nkule ɔbwéé igyí ahapú, táme megyí beɛ mu anáin botsú Lewifɔ́tɔ sù ɔɔbwe igyí ɔhapú. Mboún mu nkpa ání umɔ́mɔ ɔnɔ ékekekeke túmitɔ ɔna ɔɔbwe igyí ɔhapú. ¹⁷Tsúfé bɔ́wanlín wá Bulu asún ámutɔ beɛ, “Bulu igyí ɔhapú fúgyi bré féétó, fé Melkisedek.” ¹⁸Idesuná ání balé igyíha mbla dada amu ibwi, tsúfé umɔ́wa ogyá, umɔ́wa labi é. ¹⁹Tsúfé Mose mbla ámu métalí bwé tɔtɔtɔ ifun. Séi á, Bulu lapú aní ɔkpakí wankláán ání ɔdun mbla dada amu yáí mú otsiákpá. Múá íbékpiá aní mantáa Bulu.

²⁰Bulu léka Yesu wɔ ntam ání ɔbɔ́bwe mu igyí ɔhapú bré féétó. ɔmeká igyí ɔhapú bámbá ɔkukukuku wɔ ntam. ²¹Yesu wɔ ntam ání ɔleka bréá ɔɔbwe mu igyí ɔhapú gyí,

“Mí Bulu, naká mí wɔ ntam ání
igyí ɔhapú fúgyi bré féétó.
Mméelatse mí agywun!”

²²I na ntam anfi su Yesu labɔ́bwe ɔma ɔlípú há Bulu nhíhé ání íhé bu alé dun nhíhé dada amu.

²³Bulu igyí ahapú ámúú betsiá nhíhé dada amu ɔnó ámu buhíé butɔ, tsúfé butowú sí agyúamá ámu tswi. ²⁴Yesu mú bu unv bré féétó. Mú sv mu Bulu igyíha mɔmɔ ɔnó ekekeeke. ²⁵Mú sv ɔtetálí hɔ ahá ání butɔtsun musu ba Bulu wá féé nkpa plíplíplí. Tsúfé otsie Bulu wá, ɔde mu kokóli amú nwunsv bré féétó.


²⁶Yesu gyí Bulu igyí ɔhapú dehen onutó ání anidéhián ni. Mu iwí letun, tsitsa kuku uma mu iwí. Lalahe kukuvuku é uma mutɔ. Bulu léle mu lé lakpan abwepú ɔkpasu, há mu otsiákpá fváhé ɔsúsú. ²⁷Imehián ání mu mú obégyankpá bɔ mu lakpan iwí afɔdie, fé igyí ahapú dehen atráhe amu. Amú mú betsiá bɔ há amú onutó lakpan ekekegyíeke, asa bɔbɔ há ahá atráhe. Ɖsáwule pé mu mú ɔlɔbɔ afɔdie há ahá féé lakpan, bréá ɔlɔpu mu iwí bɔ afɔdie ahá féé nwunsv. ²⁸Mose mbla léha ahá ání bapɔn bɔbwe Bulu igyí ahapú dehen. Táme mbla ámu ɔma a, Bulu léka ntam lé mu Bi. Alahá mu Bi ámu labwé mu igyí ɔhapú dehen ání ɔlɔfun bré féétó.

Ant Igýí Ɖhapú Dehen

8 ¹Asún ání ndeblí féé gyí, aníbu Bulu *igyí ɔhapú dehen ání ógyi alí, otsie Bulu Otúmípu amu obíá gyɔpɔsv ɔsúsú. ²Ɖde Bulu igyí ha Ɖwankíkpatɔ Ɖwankíkpa onutó ání íbu ɔsúsú unv. Mú mú á, Bulu onutó léyi mú, megyí nyankpɔsa.

³Bulu igyí ɔhapú dehen okugyíɔku á, mu agyúamá gyí, ɔbɔpu ahá ámu atɔ hahé pú amú afɔdie-abɔtɔ há Bulu. Íni sv ilehián ání aní Bulu igyí ɔhapú dehen Kristo é obénya tɔá ɔbɔpuhá Bulu. ⁴Ní ɔsulúv anísv ɔbu a, teki ɔmɔbwe Bulu igyí ɔhapú ekekeeke. Tsúfé Bulu igyí ahapú onutó bubu unvá butehá Bulu igyí Mose mbla ɔnó. ⁵Igyí ahapú amu butɔtswe Bulu igyí ɔhakpá ání ulélan ɔsúsú *tati-obu ámu. Íni sv Bulu léda Mose ɔlá bréá ɔbɔbwe tati-obu ámu ɔbéé, “Kí ání fɔbwe tógyítɔ fé obu ámúú nele súná fú íbusv unv ámu odu pépéépé.” ⁶Táme Yesu igyíha agyúamá ámúú Bulu léha mu amu léhié fúá dun ɔsulúsv igyí ahapú dehen amu klé. Ntam

Heb



Bulu ɔtswékpa tati-obu ní. (Hebrifo 8:5)

ɔɔpwe á múú ibu ania Bulu nsuné, Yesu gyí mú ɔma ɔlúpú amu é thíé bu alé dun ntam dada amu. Tsúfé ɔlehie atoyiléá mɔ́bwe há aní wá mútɔ́.

⁷Ntam gyankpapu amu umɔ́fun. Ní ulɔ́fun a, teki nyɔɔsi metrá hián. ⁸Táme Bulu lówun ání anyánkɔ́sa bomebí bwé. Mú su ɔleblí ɔ́béé,

“Eke ɔku íbá. Mí mli Wíe déblí.

Mía Israelfɔ́ pú Yudafɔ́ abéka ntam ɔɔpwe.

⁹Imɔ́ɔbwe fé mú á múú iletsiá mía amú anáin nsuné, bré á múú nekítá amú ibi, kpá amú dalí Egipte ɔsulúsu ámu.

Tsúfé bomegyi mí ntam amusu.

Íni su nesi amú iwí há amú.

¹⁰Ntam anfi obétsiá mía Israelfɔ́ nsuné eke ámu ni. Mí mli Wíe déblí.

Nɔ́pu mí mbla wá amú nwuntɔ́, nɔ́wanlín mú dínká amú klonsu.

Nɔ́bwe amú Bulu, amú é bɔ́bwe mí ahá.

¹¹Amútɔ́ ɔkuku méetrá suná mu pio,

ntée mu ba obée,
obú Bulu.

Tsúfé amú fée bébi mí.

Tsú nyebísú yófun ahandesu.

¹²Nési amú lakpan kíé amú.

Mméetrá kaín lalaheá babwésú.”


¹³Ní ani Wíe dé ntam pɔpwe iwí asún blí á, múmú ilosuná ání dada amv utráa ma labi mu ansító. Tóá uladan bwe dáda a, wu itowú.

Ɔsulúsv Móa Ɔsúsú Bulusúm

9 ¹Bulusúm mbla letsíá Bulu ntam dada amutɔ. Bɔbwe *tati-obu ání bósum Bulu mútɔ ɔsulúsv nfi. ²Bɔpu tati tin *tati-obu ámu ɔnɔ, bɔpu ukule é ká mútɔ. Beti obu gyankpapu amutɔ bɛɛ, Ɖwankíkpa. Ɖkandíe-oyí ání butonywé nkandíe bian músú pú ɔpúnú ání bodobodoá bapóhá Bulu igyí idin músú bu unv. ³Obu nyɔɔsi amú ubu tati nyɔɔsi amv ɔma amutɔ butetí, Ɖwankíkpatɔ Ɖwankíkpa ni. ⁴Sika pepe *afɔdiɛ-asubwi bu unv. Bulu *Ntam-dáka ání bɔpu sika pepe píatá mú iwí fée é itsie unv. Butɔwá ɔhíén ogyá afɔdiɛ-asubwi ámusv. Atoku asa búv Bulu Ntam-dáka ámutɔ. Múgyí, sika pepe ɔlankabi ání atogyihe kvá beti mú *mana bu mútɔ, *Aaron oyi yíáhé amú ɔlɔpɔí ámu pú abwi pétéplé anyɔ amú Bulu lówanlín mu mbla dínká músú ámu é bu mútɔ. ⁵Bɔbwe Kerubim anyɔá bubv numnyam, bugyi ntobí akvá bubv abámba dínká ntam-dáka ámu obuasusu. Amú fée betinkí amú abámba fia aba, ilobun dáka ámusv. Amú nsuné unv Bulu tesí ahá lakpan kíé amú ní. Táme megyí séi abéle asún ánfí así.

Heb

⁶Alí bela ntobí ámu yáí unv ní. Bulu igyí ahapú ámu butowíé obu gyankpapu, igyi Ɖwankíkpa amutɔ ekekegyíeke yóyɔ amú agyómá. ⁷Bulu igyí ɔhapú dehen pé towíé obu nyɔɔsi, igyi Ɖwankíkpatɔ Ɖwankíkpa amutɔ. Ɖtsáwule pé otowíé unv ofítɔ. Ilehíán ání ɔbɔpu ɔbwi obugya ání ɔbɔpubɔ afɔdiɛ há Bulu mu onutó nwunsu pú ahá lakpan ání bɔbwe, bumeyín sv ya unv. ⁸Tóá Ɖɔɔe Wankíhé amv désuná tsú ntobí



Bulu Ntam-dáka ní. (Hebrifo 9:4)

ánfí iwí gyí, Ɖwankíkpatɔ Ɖwankíkpa unu ɔkpa lefin wa amú bréá *tati-obu ámu gyí amú Bulu ɔtswékpa. 9Íni igyi atosuanhe há nde ɔyi kehe. Idesuná ání ibu mútɔ́á butɔpó

ato hahé pú afɔdiε-abɔtɔ há Bulu igyí, táme uméetalí há mú ɔhapú ámu klɔn isi mu ipɔn ha ání mu iwí latɔn tsú mu lakpantɔ. ¹⁰Tsúfé ntobíá igyi, atogyihe, atonuhe pú amándíé ání nyankpusa tɔpúgyúra iwí keke mbla ámu losuná. Bulu lɔbwe mbla ámu féé há nyankpusa, ání ɔkíta mótɔ bɔfun bré ánti alabwé ɔkpa pɔpwe ání bɔpubwé mú ánti, aníméetrá bwe dáda amu.

¹¹Kristo labɔbwe Bulu igyí ɔhapú dehen há ato wankláán ámúú ilaba ámu. Mu *tati-obu ání ɔbu mótɔ bu ɔsúsú. Inu tati-obu ámu dun ɔsolúsu klé, ulɔfun dun mú é. Megyí nyankpusa lɔbwe mú mú, imotsú ɔyí ánti é. ¹²Megyí atrukpa pú nnantswie yínhé obugya Kristo lɔpuya ɔwankíkpatɔ ɔwankíkpa inu. Mu onutó obugya ɔlɔpuya inu, ɔlɔpká aní nwunsu iko ɔtsáwule pé, anúlénya nkpa ání utamatá. ¹³Mose mbla ámu ɔnɔ á, akpaláa pú nnantswie obugya pú ɔnantswiebí ání bawá mu ogyá, alahɔ nsúo butowúnya wúlí ahá ání ifin lada amú, púgyúra amú. ¹⁴Ní betalí bude mbwí obugya kúrúá putun ahá iwí á, ntogyi su Kristo obugya méetalí tun ahá iwí dun? Kristo lótsun ɔnɔ ámúú ibu inu bré féé ámúsu, pú mu iwí lé mbusuo ání ulɔfun há Bulu. Mu obugya amu íbétun aní kluntɔ tsú bwehéá íbékpa aní wá lowutɔ iwí, méni abétalí súm Bulu ɔkiankpapu amu.

¹⁵Íni su Kristo gyí ntam pɔpwe ání ɔbu Bulu mva anyánpúsa nsiné ɔma ɔlípú, méni ahá ámúú Bulu latí ámu bénya atɔ ámúú itamayíntá, ɔlehε yái há amú ámu. Tsúfé Kristo lowu ámu ilahá amú bagyi iwí tsú lakpan ámúú bɔbwe bré ámúú bubu ntam gyankpapu amu así ámutɔ.

¹⁶Ní ɔku ɔwánlín nhúhé há mu atótɔ yéε tswí a, otowú asa itɔyɔ agyúmá. ¹⁷Tsúfé nhúhé ámu uma labi bréá ɔhá ámu onutó tsie nkpa. Mu lowu ɔma itɔwá labi. ¹⁸Íni sù bɔpu obugya sí Bulu ntam gyankpapu amu ésú asa ulɔyɔ agyúmá ní. ¹⁹Tsúfé bréá Mose lékla mbla ámu féé súná Israelfɔ tá á, ɔlɔpu ntsu fráa nnantswie pú akpaláa obugyatɔ, pú kufa iwí imi pepe múa ífá kvá butetí mú Hisop wúnya obugya fráhe amu wúlí mbla ɔwulú ámu pú ahá ámu féésú. ²⁰Múú ɔleblí ɔbéε, “Obugya ání ndepusí ntam ání Bulu laká há mlisu ní.”

²¹Alí kén ɔɔpɔ obugya amu ku wúnnya *tati-obu pú ntobí ámúú butɔpútswe Bulu ámu féésú ní. ²²Lélé mú Bulu mbla ámu ɔnó á, abétalí blí anaa, obugya butɔpúgyúra tógyító. Ní bumɔpɔ obugya lé mbusuo á, lakpansikíé tamaba.

Kristo Afɔdie Télé Aní Tsú Lakpantɔ

²³Alí ilehián aní bɔbwe amándíé ánfí púgyúra ntobí ánfí igyi fé ɔsúsú klé amu ní. Táme ɔsúsú klé amu ilehián afɔdie aní ihíé dun ɔsulúsu klé anfi. ²⁴Íni sù Kristo mówie *tati-obuá nyankpusa lɔpɔ mu ibi bwé, igyi fé ɔsúsú klé amu odutɔ ní. ɔsúsú ɔɔɔyó yélí Bulu ansító, ɔde mu kokóli ha aní. ²⁵Ɔmɔpɔ mu iwí yɔbɔ afɔdie tsenyɔ-tsesa, fé alí ámúú Bulu igyí ahapú dehen amu butɔpú mbwí obugya ya ɔsulúsu Ɔwankíkpatɔ Ɔwankíkpa unv offígyíofí ámu. ²⁶Ní alí igyi á, tekí ilehián aní Kristo obétsiá wun iwíɔsun wú tsé dú tsé lafa, tsú bréá ɔyí lefi así ɔpá. Mboún alalé iwí ɔwan ɔyí ɔnɔmɔbí ánfí, pú mu iwí ɔbɔbɔ afɔdie ɔtsáwule pé púlé ahá tsú amú lakpantɔ. ²⁷Igyi fé alíá ida yáí aní ɔtsáwule pé ɔha obówu. Mú ɔma a, Bulu obégyi mu asún. ²⁸Alí kén Kristo lɔpɔ mu iwí bɔ afɔdie ɔtsáwule pé, púlé ahá tsɔtsɔtsɔ tsú amú lakpantɔ ní. Mú sv ní ɔlé iwí ɔwan otse nyɔɔsi a, imehián aní ɔbétrá bwe tɔtɔ tsú lakpan iwí. Mboún ahá aní buhíé butsie bugyo mu nkpa ɔbá ɔbɔhɔ.

10 ¹Alí ámúú Mose mbla léle súná aní bupúha Bulu igyí amu ilelian mú ámúú ibéba amu keke. Mú onutó ámu Kristo labɔbwe á. Afɔdie oloku ɔkule amu betsiá bɔ há Bulu ofíígyíofí. Táme umetalí há ahá ámúú butebeha igyí amu abufun Bulu ansító. ²Ní iletalí tin amú iwí Bulu ansító ɔtsáwule pé á, tekí besi afɔdie ámu ɔɔ, amú klun é ilesi amú ipón ha aní babwé lakpan. ³⁻⁴Tsúfé nnantswie yínhé pú atrukpa obugya méetalí lé nyankpusa tsú mu lakpantɔ ekekekeke. Mboún ha utehá mu ɔtekáin mu lakpansu ofíígyíofí. ⁵Íni sv bréá Kristo ɔbá ɔyító á, ɔlebláa Bulu ɔbéé, “Megyí atɔ hahé múa afɔdie fúdedunká.

Mboún ɔyulúv fela yáí mí.

⁶Fú ansí megyi mbwí tóhé pú lakpan afɔdie iwí.

7 Múú neblí mbéé, ‘Mí Bulu, mí ní.
Nebá bɔbwe fú apé,
fé alá bɔwanlín mí iwí asún wá
fú asun wanlínhé amuto.’ ”

8 Olegyankpá blí ɔbéé, “Megyí afɔɔɔie múa ato hahé, mbwí tshé pú lakpan afɔɔɔie fúdedunká. Fú ansí megyi mú iwí.” ɔleblí alí, táme mbla ɔkpasú ilehián ání bɔbwe mú. 9 Múú ɔletrá blí ɔbéé, “Mí Bulu, mí ní. Nebá bɔbwe fú apé.” Mú su Bulu lalé afɔɔɔie dada amu ibwi, pú Kristo afɔɔɔie ámu wá mú otsiákpá. 10 Yesu Kristo lɔbwe Bulu apé, pú mu iwí bɔ afɔɔɔie aní nwunso ɔtsáwule pé, há bré féé. Mú su aní iwí latin.

11 Igyí ɔhapú okugyíɔku telí bɔ afɔɔɔie oloku ɔkule amu ekekegyíeke. Afɔɔɔie-abɔɔɔ á múú otenyá pú bɔ mú tsé dú tsé lafa ámu kén ɔɔpú bɔ mú ní. Táme afɔɔɔie ánfí méetalí lé ahá tsú amú lakpantɔ ekekeeke. 12 Kristo mú lénya bɔ lakpan iwí afɔɔɔie ɔtsáwule pé ámu a, iletá féé, oleyétsiá Bulu gyɔɔɔisu. 13 Tsú alí bré ámutɔ ɔpá otsie unu ogyo bréá Bulu ɔbɔpu mu alupú bwé mu ayabi oyíkpa. 14 Mu afɔɔɔie kule pé ámu ulahá ahá á múú Bulu lapú amú bwé mu kle amu bafun ha bré féé, ɔlala kukukuku itráa ma amú iwí.

15 ɔɔe Wankíhé é légyi mú iwí adánsie súná aní. Olegyankpá blí ɔbéé,

16 Aní Wíé ɔbéé,
“Ntam anfi obétsiá mía amúnyɔ nsiné,
bré á múú íbá ámutɔ ní.

Nópu mí mbla wá amú kluntɔ,
wánlín mú wá amú nwuntɔ.”

17 ɔletrá blí ɔbéé, “Mméetrá kaín amú lakpan pú amú lalahesu ekekeeke.” 18 Mú su ní Bulu lasí lakpan kíé á, múmú mú iwí afɔɔɔie kuku itráa medéhián é.

Mlha Akpukpe Manta Bulu

19 Ínu su mí apíó, Yesu obugya amu su aníbu ɔkpa wíé ɔsúsú ɔwankíkpátɔ ɔwankíkpá unu faan. 20 Mu lowu ámu su alafínkí tati á múú bɔpuká obu ámutɔ ámu há aní. Múgyí ɔkpa ɔpɔweá itehá aní nkpa ní. 21 Aníbu Bulu *igyí ɔhapú

dɛhɛn kpɔnkpɔnkpɔntɪ ɔkɔvá ɔdɛ Bulu ahásv kú. ²²Mú sv mlɪha apu uklɔn ání ɪbu ɔnkɔkwali, pú hógýiá mú ɔnɔ́ bu ɔnlɪn kpukpɛ manta Bulu. Tsúfɛ alapú Kristo obugya gyúra anɪ. Anɪ klɔn méɛtrá ha anɪ pón, alapú ntsu wánkíhé é fwí anɪ ɪwɪ. ²³Mlɪha akɪta tɔ́ ámúb anidé mú ɪwɪ adánsɛ gyí, anidé mú ɔkpa kú amutɔ kínkín, tsúfɛ ɔnkɔkwaliɪpu Bulu gyí. ɔbɔ́bwe tɔ́á ɔlɛhɛ ání mɔ́bwe há anɪ. ²⁴Mlɪha akɪ alɪá ɪbɔ́bwe abówa aba ɔwɔnlín, ɔdwe múa yilébwetɔ. ²⁵Mlumáha asi anɪ ofiakpa yɔ, fé alɪá aku budɛbwe. Mboún mlɪha atra wa aba ɔwɔnlín tsía. Tsúfɛ mlɪdɛwúun ání anɪ Wíe ɔbáke ámu ɪdɛkpukpé bá.

²⁶Mí apíó, lakpan ɪwɪ afɔdɛ kɔku ɪtráa ma ɪwɪ há anɪ, ní akɪ ansí bwé lakpan bréá anɪlabí ɔnkɔkwali amu. ²⁷Mboún tɔ́á ɪlasí gyí, abétsiá ifúsú gyo Bulu asún ogyíkɛ pú ogyá kpɔnkpɔnkpɔntɪ ámúb ɪbɔ́hɔ́ Bulu alupú ámu. ²⁸Ní ahá abanyɔ́-abasá begyi ɔku ɪwɪ adánsɛ, ání alakíná Mose mbla ámusv gyí a, butɔ́mɔ́ mu. Butamawun mu nwe. ²⁹Múmú ní ɔku ɔkɪ Bulu mu Bi ámu ansítɔ́ kótíkótí, omobu ání mu obugya amúb Bulu lɔ́psí mu ntamsv, ɪlogyuráa mu ɪwɪ ámu bu ɪbíá, olesia Bulu awɪtɔ́lɛ ɔɲé ámu mú á, mu ɪsvutí ání ɔbɛ́hɛ nyá méɛba kú. ³⁰Tsúfɛ anyin ání Bulu léblí ɔbɛɛ, “Mí, mlɪ Wíe téká lalahe ɪkɔ. Mí ɔbɛ́ka aha laláhe ako amú lakpan sv.” ɔlɛtrá blí ɔbɛɛ, “Mí, mlɪ Wíe obégyi mí ahá asún.” ³¹ɪbu ifú ání fékpa wíe Bulu ɔkɪankpapu amu agbláɔ.

³²Mlumátan bré ámúb Bulu wankɪ lɔ́wankí wólí mlɪsv ámusv. Mlɪkain ání alɪ bré ámutɔ á, mlɪlɔ́tsun ɪwɪɔsun tsɔtsɔɔtsɔɔ, táme mlɪlélu kínkíínkín. ³³Betsiá síá mlɪ, wá mlɪ ɪwɪɔsun ahá ansítɔ́. Bré kutɔ́ é á, mlɪlétsa ahá ání bude ɪwɪɔsun ámu odu wúun. ³⁴Mlɪlósú ha obu adípú. Bréá ahá bɔ́pu ɔwɔnlín swí mlɪ atɔ́ á, mlɪlési há amú ansigyísú. Tsúfɛ mlyin ání mlɪbu atɔ́á ɪbu alé dun mú, ɪbétsiá bré féétɔ́. ³⁵Mú sv ɪmákpɔn mlɪ. Mlɪkɪta ɪwɪ, amlɪlu kínkín, tsúfɛ mlɪbu ɪkɔká kpɔnkpɔnkpɔntɪ Bulu wá. ³⁶ɪlɛhián ání mlótomi, ménɪ mlétalí bwé Bulu apé, fówun mlénýa ɪtɔ́ ámúb Bulu léhɛ yáí há mlɪ ámu. ³⁷Tsúfɛ bɔ́wanlín wá Bulu asun wanlínhé amutɔ bɛɛ,

“Iméegyí nke kuku Bulu obówotií.

Omówa ópá.

³⁸Ahá ání amó hógyi su Bulu latsú amó ání amó asún da ɔkpa obétsiá nkpa.

Táme ní amútó ɔku mówa klɔn kítá iwɪ mu hógyito, oleyinkí ɔma mú á, Bulu ansí méegyí mu iwɪ.”

³⁹Táme animégyí fé ahá ání badámlí ɔma há Bulu, bafwí. Mboún anigyí ahá ání amó hógyi laho amó nkpa.

Hógyi

11 ¹Hógyi gyí ansí pɔdínká tóá fumɔkúwun, táme fude mú ɔkpa kísv. ²Ahá amúó betsiá bímbí ámu hógyi sù Bulu ansí légyi amó iwɪ.

³Ani hógyi sù anulébu ání asún Bulu léblí púlé ɔyí. Mú su tóá ansíbi towun ledalu tsu tóá ansíbi tamawuntó.

⁴Hógyito *Habel lópv mu atɔ hahé ání ɪbu alé dun mu dehen *Kain klé há Bulu igyí. Mu hógyi su Bulu ansí legyi muv mu atɔ hahé ámu iwɪ, olotsu mu ání mu asún da ɔkpa. ɪbu mútótá olowu dododo, táme mu hógyi amu su ɔtráa ɔdetó bɔfun nde.

⁵Hógyi su Enok mówu asa Bulu lótsu mu, ɔhaa mówun mu. Bulu asun wanlínhé legyi mu iwɪ adánsɪe ání olegyi Bulu ansí asa olotsu mu náti. ⁶Mlɪkɪ, ɔhaa méetalí gyi Bulu ansí ní ɔmɔhɔ mu gyi. Tsúfé ilehián ání ɔhá ání ɔbéba Bulu wá obóhogyi ání Bulu bu ɪv, ɔteká ahá ání butodúnká mu ɪkɔ.

⁷Hógyito *Noa lónu asún ání Bulu lébláa mu tsú tóá ɪmɔkúnýá ba iwɪ. Olobu Bulu, sré dáka kpɔnkpɔnkpɔntɪ, púhɔ muv mu wóyító ahá nkpa, bréá ntsu ɪɔblá. Mu hógyi amu sù ɔyító ahá begyi pón, ɔɔbwe ɔhá ání mu asún da ɔkpa Bulu ansító.

⁸Hógyi léha *Abraham lóbu Bulu bréá Bulu lébláa mu ɔbéé, ɔdálɪ mu ɔmátó, ɔyɔ ɔsulúv ání mu Bulu léhie há musv. ɔlenatí dálɪ mu ɔmátó, omeyín ɔtínéá ɔyó. ⁹Hógyi léha ɔɔyɔbwe ɔfɔ ɔsulúv amúó Bulu léhie yáí há mu

Heb

amusu. Tati-obuto oletsia unu. Ali ken *Isak mua *Yakob ani Bulu lehie wulubu amu yai ha e betsia tati-mbuto wulubu amusu ni. ¹⁰Tsufe Abraham letsia tati-obuto, ogyo wulu kponkpwonkpontia Bulu leda, imobwie ekekeke.

¹¹Hogyi leha Abraham mua mu ka *Sara benya obi kwii. Lbu muta ani badan tsun ikwusu, Sara e menya ikwii. Abraham lohogyi ani Bulu obegyia tsa alahie yaisu. ¹²Inu su ma kein ani buma uklatu, butso fe ntsrakpabi ntee opu onu isi belun tsu Abraham ani aladan tsun ikwusutu.

¹³Hogyito aha anfi fee bowu. Lbu mutsa amu ibi meda atsa Bulu lehie yai ha amu asa bowu. Tame bowun mu sisi, amu ansi legyi mu iwu. Botsu mu ani afu pu okpa atupu bugyi yai anfitu. ¹⁴Aha ani botsu mu ali budele suna ani bude ma ani wabwe amu onutu kle dunka. ¹⁵Ni bude ma amuu bedali tsu muta amu iwu susuu a, teki bodunka okpa yinki yu unu. ¹⁶Tame wusu ma ani ibu akile dun mu amuu bedali muta amusu amu ansi dun. Mu su uma Bulu peli ani beti mu bee, amu Bulu. Tsufe alala wulu kponkpwonkponti ku yai ha amu.

¹⁷Hogyi leha Abraham lekiti mu bi *Isak wabwa afodie ha Bulu brea Bulu losu mu ki. Lbu mutsa obi anfi Bulu lehie mu ani wabkwii ni, tame wotswe mu kpokpu. Wokusu pu mu bi wokunu wule amu wabwa afodie amu. ¹⁸Lbu mutsa ali bre amutu a, Bulu lablala mu wbee, "Fu bi Isak abi-ana wabwe fu abi-ana ni." ¹⁹Tame Abraham lotsu mu ani Bulu wbetali tsinki Isak. Lela mu, okpa wusu a, wलयया Isak fe wa ani Bulu lakusa tsu afulitu.

²⁰Hogyi leha Isak loyula mu atabi Yakob mua *Esau. Mu ansi dun ani Bulu wabwe tsa wlehie ha amu ekeku.

²¹Hogyito brea Yakob wa bowu a, oloyula *Yosef abi anyo amu, olobun mu oyi yiahesu sum Bulu.

²²Hogyito brea Yosef wa bowu a, wlebi wbee, Bulu wbele Israelfu tsu Egyipte wmatu. Mu su wleda amu wa wbee, bumasi mu awu tswu unu.

²³Hogyi leha brea wakwi Mose a, wpu mu gani tsra asa. Tsufe bowun ani wbu akile. Mu su bumanya owie amu mbla ani wwa tswu ifu.

²⁴Hógyi léha Mose lékiná ání bumáti mu Egyipte owíe mu bi tsíhé mu bi bréá ɔledan. ²⁵Olotsulá ání buwáa mu Bulu ahá iwɔsuntɔ, dun ání obénya lakpanbwe iwɔ ansigyí bré itinbí. ²⁶Olotsulá ání busúpa mu *Kristo su. Tsúfé íbéhie wá labi há mu dun ání obénya Egyipte atonyahé féé. Mu ansí dun ɔkɔá Bulu ɔbéka mu ekekúsú.

²⁷Hógyi léha Mose lénatí Egyipte ɔmátɔ, omenya owíe amu ɔbló ifú. Mu ansí dun Bulu ání ɔhaa tamapú ansíbi wunsu. Mú su olotomi, omeyinkí ɔma. ²⁸Hógyi léha mu ɔleha Israelfɔ befi *Katsun Nke gyí asu. ɔleha amú bɔpu obugya kpá amú obu-ɔnɔ, méní *Bulu-ɔbɔpuá ɔtɔmɔ ahá ɔmɔɔpu íbi da amú bití.

²⁹Hógyi léha Israelfɔ bɔtsun ɔpu Pɛpɛ amutɔ fé ɔsulúw wulhesu búna. Táme bréá Egyiptefɔ é bæ abutsun a, ɔpu amu lékitá amú.

³⁰Hógyi léha Israelfɔ benatí bómlí abuntíi ání bɔpu gyi íban wá Yeriko wúlu nken síénɔ, ilobwie bun gbloo. ³¹Hógyi léha obu-ɔnɔ otsiápú Rahab mówu tsía ahá ání bumɔhɔ Bulu gyitɔ. Tsúfé ɔlɔhɔ Israelfɔ ansí awakupu afɔw wankláán.

³²Ilehián ání nétrá wanlín iku é? Bré mɔtsɔ ání nɔwanlín Gideon mu Barak pú Samson, Yefta mu *Dawid, Samuel mu Bulu ɔnɔsú atɔpú amu hógyi iwɔ asún. ³³Hógyi léha amú bɔkɔ ɔmá-ɔmá gyi amúsú, bɔbwe tɔá ida ɔkpa. Benya atɔá Bulu léhie há amú, beha agyatá ndatɔ leklí. ³⁴Bodun ogyá kpɔnkpɔnti, bumésin isá. Hógyi léha amúá bɔpɔn benya ɔwunlín, amú aku benya ɔkɔ túmi, gyi amú anyabású. ³⁵Bulu létsinkí atsi aku afúli há amú. Ahá bepítí amú aku atɔ alu mɔ amú. Mú óó á, bumotsulá kíná Bulu. Uɔwa amú ɔdweá bómu amú dun ání béyinkí Bulu ɔma, méní Bulu ɔbɔkusúá amú, bénya nkpa ání íbu alé dun.

³⁶Bɔbwe amútsɔ aku ahinlá, pítí amú mpli. Bɔwa amú aku ɔkan, pú amú tswi obu. ³⁷Beda amútsɔ aku abwi mɔ, pú saa bóí akutɔ, aku é besin ɔdayí ɔnɔ. Amú aku é bedi akúfa múa akpaláa nwulú-kpákpátɔ nátí kí, aku bedi akún. Bedunká akusu, wá amú aku é iwɔsuntɔ. ³⁸Teki megyí ɔyí ánfí odutɔ ahá ánfí bétsiá asa. Adimbítɔ múa abusu benatí kí fé ɔkun abɔpú, tsía dí abwi alatɔ múa mbótɔ.

³⁹Amú hógyi sù Bulu ansí légyi amú féé iwí. Ɖkuku ibi mēda tṣá Bulu léhɛ yáí. ⁴⁰Tsúfé atṣá ibu alé, ibówa labi iwí Bulu lóbwē agywun yáí há ania amúnɔ́ féé. Mú su amú nkule buméetalí nyá mú, yófun bréá Bulu labwé ania amúnɔ́ féé anilafun mu ansító.

Ani Sí Bulu

12 ¹Anibu ɔ́ɔm anfi bɔpu hógyi tsíá ánfu odu bómlí anu. Mú su mliha anu é atswi tógyítṣá ide anu butía ya ɔma pú lakpan ání ilakíklí anu kínkíínkín tsalífwi, atomi tsii ɔsrú amúbú ida anu ansító ámu. ²Mliha apu ansí dínka Yesusu. Mɔgyí anu hógyi nfiasí pú mú ɔ́ɔmɔ. Íniá oyin ansigyí oduá ida gyo mu su á, olotomi wun ipian *oyikpalíhesu wú. Omobu kpóí ání bókpóí mu tɔtɔ, alayó otsie Bulu owíe obiá ámu gyoɔpu.

³Mlipuki ipian ání olotomi wun lakpan abwepú ibitɔ, bréá bolu mu, wá mu iwɔsɔntɔ, méni ɔ́ɔ́é méeta mli, mluméesi mu hógyi. ⁴Iwíá mlidépri le iwí lakpantɔ á, mlumókútálí pri yófun bréá mlési mli nkpa há. ⁵Mlumátan utóí ání Bulu lóṣí kplá mli ánfu mliɔ́gyí mu abísú. Ɖbée,

“Mí bí, ní nebítí fú isu á, máhɔ́ mú lalahe su.

Ní ɔ́wá iyin wa fu á, máha mú ikpɔ́n fu.

⁶Tsúfé ɔ́há ání ntɔ́dwé á, mu ntɔ́wá iyin wa.

Ɖhá ání ɔ́púbwé mí bí á, mu ntebítí isu.”

⁷Tomi wun ipian fé isu bude fú butí. Bulu dé mli isubití fé mu abí. Tsúfé obi ɔ́mɔmu bu unvá mu si tamabítí mu isu? ⁸Ní ɔ́mēbutí fú isu fé alíá ɔ́ɔ́bwé mu abí féé á, idesuná ání megyí mu bi onutó fúgyi, klétobi fugyi mu. ⁹Anu ɔ́sulúv anfisú así butebítí anu isu, anitóbú amú é. Ntogyi sù animóotsulá ba iwiasí há anu Sí Bulu dɔn amó, anya nkpa ání utamatá? ¹⁰Bré itinbí pé anu ɔ́sulúsu así butɔ́púbítí anu isu alíá budeklé. Bulu mú á, alíá abówa alé su ɔ́tebítí anu isu, méni anu é anu iwí bétun fé mu. ¹¹Ní bude anu isu butí á, itehan anu alí bré ámɔtɔ. Ansí tamagyí anu. Táme isubití ámu ɔ́ma a, anitɔ́bwé yilé, tsíá iwilwiitɔ.

Atosunáhé Pú Oláda

12Mú su mli máha abatɔ iwu mli, akpawunuto ikpunku mli. Mliwa iwɔ ɔwunlín! 13Mliha mli tsiátɔ iwa alé, méni abubúpu amu buméesin tsukule, mboún bénya ulotsá.

14Mliɔ mbódí amliha iwilwii itsia mliha ɔhagyícha nsiné. Mlitsia nkpa ání mú iwɔ letin, tsúfé ɔhá ání mu iwɔ métin móowun aní Wíe. 15Mliki ání mlitɔ ɔkukuvuku mɔɔhulú Bulu awitɔle amu. Mlitɔ ɔkuku é mási asún wá mu kluntɔ, méni ɔmɔɔpu asún wá mli nsiné, iyinta mlitɔ aku. 16Mliki ání mlitɔ ɔkuku é mɔɔbwe mu iwɔ mbua ɔtɔpú, ntée ɔhá ání ɔtamabú Bulu fé *Esau. Mlɔɔpu mu hande tse ɔtsáwule atogyihe. 17Fé alá mliyin yaí á, ɔma a, olobodunká obi dehen oyúla tsú mu si wá, táme mu si lékiná mu ha. Ibo mútɔ́á ɔlehie su kokóli mu si, táme omenya mútɔ́ ɔkpa.

18Megyí ibvá mlétalí pu ibi da asi mlilaba. Ɖínéá oklún tuun pú afú kpɔnkpɔɔnkpɔnti bu, ogyá é idetsíí fé Sinaibu ámú Israelfo bɔyɔ mú asi bréá Bulu dépu mu mbla há amú ámu asi mlilaba. 19Inú bonu ɔkpe lɔfulí kúklóókú, bonu ɔme kpɔnkpɔɔnkpɔnti ku lelun bláa amú asún, su bokokóli bee itsia ali, bumedékléá betrá nu asvansu. 20Tsúfé bumetalí gyí mbla ámú Bulu lówa há amú ɔbéé, “Ní ɔbwi ɔku kúráá iwɔ ida ibu ámu a, budáa mu abwi mɔ” ámu su. 21Tɔ́á bowun unu lówa amú ifú. Mú su Mose óó léblí ɔbéé, “Ifú lahá mí ndekpunkí!”

22Mli mú á, *Sionbu asi mlilaba. Bulu Ɖkɔankpapu amu wúlu yilé, igyi ɔsúsú Yerusalem pú Bulu-abɔpu mpím-mpím ansí ogyíkpa mlilaba. 23Bulu bití ámu abí, bugyi ahá ámú bawánlín amú adá ɔsúsú ámu ofiakpa mlilaba. Bulu, ogyi ahá féé asún ogyípú amu wá mlilaba. Mlilaba ahá ámú Bulu latsú amú ání bafun amu akláa wá. 24Yesu wá mlilaba. Mgyí Bulu mua anyánpúsa nsiné ntam ɔma ɔlúpú ni. Yesu obugya wúnyáhe amú ulɔpu yilé ba dun *Habel obugya amu wá mlilaba.

25Mú su mliki wankláán, méni mli méekiná Bulu ámú ɔde mli asún bláa amu. Tsúfé Israelfo ámú bekiná asún ání ɔlɔwa Mose blí Sinaibu asi nu ámu bumetalí srí sí isubití

ámu. Ní anu é akíná ɔhá ánti ɔdetɔí tsú ɔsúsú ánti ɔme nu á, anu usubutí bódun amú klé. ²⁶Bréá Bulu lótoí Sinaibusu á, mu ɔme léha ɔsulúv lekpunkí. Táme séi á, alahíé ɔbéé, “Nétra kpunkí ɔsulúv ɔtsáwule, kpínkí ɔsúsú é tsia mótó.” ²⁷“Nétra kpunkí mú ɔtsáwule” anfi idesuná ání Bulu ɔbékpunkí ato bwehé ámu, lé mú unv. Tśá uméekpunkí ekekekeke pé obésian.

²⁸Mú sv mliha ada Bulu ipán. Tsúfé iwíegyí ání uméekpunkí abénya tsú mu wá. Mliha abu mu, anya mu ifú, méni abégyi mu ansí. ²⁹Tsúfé lélé mú á, ogyá anu Bulu ámu gyí, ɔtɔɔ ató plíplíplíplí.

Alá Abégyi Bulu Ansí

13 ¹Mlikita mli aba Akristofɔ dweto kínkíínkín. ²Mlimátan afɔɔhɔsv. Tsúfé móléha aku bɔhɔ Bulu-abɔpu afɔɔ, umɔwankí amú ní. ³Mlikaun obu adípúsú, fé mliha amúnycɔ dá obu. Mlikaun ahá ání bude iwɔɔsin wúunsv, fé mliha amúnycɔ dé iwɔɔsin ámu wúun.

⁴Akúlu móa aká bubúu aba amú abatsiátɔ. Ɖkuku mádalu mu ba ɔma, tsúfé Bulu ɔbébutí ahá ání buda ahá ání bumegyí amú akúlu ntée amú aká wá, pú mbua atɔpú féé isv.

⁵Kóba asún umáduv mli ɔdwe wa. Tśá mli bu igyí mli ansí, tsúfé Bulu lablí ɔbéé, “Mméenatí sí mli, ntée kína mli ekekekeke.” ⁶Mú sv abétalí wá klun blí aniaa,

“Mí Wíe Bulu gyí mí ɔbuápu.

Mú sv tɔtɔ mɔɔwa mí ifú.

Nto nyankpusa ɔbétalí bwé mí?”

⁷Mlikaun mli nkpa agyápu amúv begyankpa bláa mli Bulu asún ámu sv. Mlíki alá bɔputsiá, amlunya hógyi fé amú.

⁸Alí amúv Yesu Kristo gyí igye ámu a, alí ógyi nde, alí kén obétsiá bré féé é ní. ⁹Mú sv mli máha atosunáhé ɔtsan-ɔtsan igyi mli ansí, ibutia mli le ɔkpa wankláán ámu sv. Ibv aláa mléha Bulu ɔbówa awitɔle há mli ɔhétɔ ɔwunlín, megyí atogyihe mbla, ání utamawá labi kuku há músú agyípúsv gyí.

¹⁰Aníbu *afɔdɛ-asubwi kvá igyí ahapú amúv beha Bulu igyí ɔsulúsv nfi ámu buma ɔkpa gyi músú ató. ¹¹Bulu igyí ɔhapú dehen tɔpú mbwí obugya wíé Ɖwankíkpatɔ

Ɔwankíkpa unu yóbo amú lakpan iwí afòdié, butópú aye amu mú ya mmuátse, yówa mú ogyá. ¹²Íni sù Yesu é lówu mmuátse, méni ɔbópu mu onutó obugya gyúra mu ahá, amú lakpan su ní. ¹³Mú su mliha adali yɔ mu wá mmuátse unu, abukpɔi ania munyɔ. ¹⁴Tsúfé animá wúluá ibétsiá yó ɔsulósu nfi. Anigyó wúlu amúb íbá ámu. ¹⁵Mú su mliha atsun Yesusu akanfu Bulu, íbwe afòdié ání anidépuhá mu ekekegyíeke. Múgyí ɔnótó asún ání anidépuwá aní Wíe numnyam ni. ¹⁶Mlímátan awitɔlewasu. Mliye mli atótó ha aba, tsúfé mú aná gyí afòdiéá itegyí Bulu ansí ní.

¹⁷Mlibu mli nkpa agyápu, amliba iwiasí ha amú. Tsúfé butamadá ɔkpúnú mli ɔklásukú su. Buyin ání béyele alíá bɔpuki aní ɔklásu ɔnó Bulu ansító. Mliha amú abubwe amú agyómá ansigyísó, megyí nwesu. Ní megyí alí á, imówa labi kuku há mli.

¹⁸Mlitsia bɔ mpái ha aní. Nyin ání aní klɔn medé aní pón ha, táme anidékléá abétsiá tsiátó wankláán brégyíbré. ¹⁹Nhíé ndekléá mlibóó mpái, Bulu ɔháa mí ansanki ba mli wá nkenyó ánfítɔ kótóó.

Mpái Tráhe

²⁰⁻²¹Iwilwii Ɔhapú Bulu, ɔɔkɔsúa aní Wíe Yesu Kristo tsú afúlító ámu ɔháa amlitali bwe yilé kugyíkúá odeklé. Nde mu kokóli mbée, ɔtsún Yesu Kristosu ɔbwe tóá odeklé anitɔ. Yesu gyí akúfa Ɔkpapú kpɔnkpɔntiá Bulu lópu mu obugya ká ntam amúb íbu unu bré féé, mu mu akúfa, bugyi mu ahá amu nsiné ní. Numnyam íbwée mu kle yófun bréá itamatá! *Amen.

Uklá

²²Mí apió, íbu mótóá ɔsuló kútúklú nawánlín sísí mli. Táme nobwíí ipa, mliyaa asu amlunu mótó asún ání ndepuwá mli ɔwunlín. ²³Nde mli íbi ha ání balé aní pío Timoteo obu. Ní ɔɔwa ɔsa bɔtu mí nfi mú á, nékpa mu abéba beki mli.

²⁴Nehá mli nkpa agyápu pú Bulu ahá atráhe féé itsiá. Akristofó amúb bubu Italia ɔmátó ámu é behá mli itsiá.

²⁵Nde Bulu kokóli mbée, ɔwáa awitɔle ha mli féé! *Amen!